

प्रादेशिक समाचार

- व विश्व पर्यावरण दिवस रे मौके आज देश-प्रदेश मांय केई कार्यक्रम-प्रधानमंत्री अर मुख्यमंत्री प्रकृति ने बचावण रा काम मांय जनता री भागीदारी री अपील कीनी।
- व प्रदेश मांय आज वंदे गंगा जल संरक्षण-जन अभियान सरुआत-मुख्यमंत्री भजनलाल शर्मा जयपुर कने रामगढ़ बंधा मांय श्रमदान कीनो।
- व प्रधानमंत्री नरेन्द्र मोदी केन्द्र मांय वां री सरकार रा 11 साल रा काम-काज ने गरीबां रा भला ने समर्पित बतायो।
- व वरिष्ठ नागरिक तीर्थ यात्रा योजना रा तहत काल जयपुर ऊं रामेश्वरम् सारु पहली वातानकूलित रेलगाड़ी रवाना व्हेला-आठ सौ बुजुर्गा ने न्यारा-न्यारा मिन्दरां रा दर्शन कराया जावेला।

000

देश-प्रदेश मांय आज विश्व पर्यावरण दिवस रे मौके केई कार्यक्रम राख्यी ज्या। इण रो ई साल साल रो मुद्दो “प्लास्टिक प्रदूषण को समाप्त करना” राख्यी ज्यो। विश्व पर्यावरण दिवस रे मौके प्रधानमंत्री नरेन्द्र मोदी नई दिल्ली रा भगवान महावीर वनस्थली पार्क मांय खास वृक्षारोपण अभियान री सरुआत कीनी। श्री मोदी एक पेड़ माँ के नाम पहल रा तहत बरगद रो पौधो रोप्यो। ओ पौधो अरावली ग्रीन वॉल परियोजना रा भाग रा तौर ऊं लगायी ज्यो, जिण रो मकसद अरावली पर्वतमाला रा राजस्थान, दिल्ली, हरियाणा अर गुजरात समेत चार राज्यां रा 29 ज़िलां मांय सात सौ किलोमीटर लम्बा हलका ने हरा-भरा बणावणो है। ई परियोजना रो मकसद अरावली पर्वत श्रृंखला रे आरे-सारे रा पाँच किलोमीटर रा बफर हलका ने हरित बणावणो ई है। ई सागे ई इण रो मकसद जंगलात हलका ने बधावणो अर जल निकायां ने और बेहतर बणावण सागे अरावली री जैव विविधता ने बधावो देवणो है। प्रधानमंत्री मोदी पर्यावरण री हिफाज़त ऊं जुड़्यो खास वीडियो साझा कीनो। वे पर्यावरण ने हर्यो-भर्यो अर बेहतर बणावण सारु ज़मीनी स्तर माथे काम करण वाळां सगळा लोगां री सराहवणा कीनी।

000

केंद्रीय शिक्षा मंत्री धर्मेन्द्र प्रधान आज नई दिल्ली मांय एक पेड़ मां के नाम अभियान रा दूजा दौर री सरुआत कीनी। ई मौके वे मिशन लाइफ सारु ईको क्लबां रा कामकाज री निगराणी सारु वेब पोर्टल समेत खास मॉड्यूल अर एक वेबसाइट लॉन्च कीनी। श्री प्रधान वां रा संदेश मांय पर्यावरण ने बचावण सारु प्लास्टिक काम लेवण ने कम करण री ज़रूरत बताता थकां साल 2070 ताई नेट जीरो री सोच सांची करण माथे जोर दीनो।

000

विश्व पर्यावरण दिवस रे मौके प्रदेश मांय केई कार्यक्रम राख्यी ज्या। राज्य स्तर रो जळसो जयपुर रा राजस्थान इंटरनेशनल सेंटर मांय राख्यी ज्यो, जिण मांय मुख्यमंत्री भजनलाल शर्मा पांच लवकुश वाटिकावां रो वर्चुअल तरीका ऊं उद्घाटन कीनो। मुख्यमंत्री जयपुर रा नाहरगढ़ मांय बीड़ पापड़ लैपर्ड सफारी रो ई उद्घाटन कीनो। वे राज्य रा 54 स्थानीय निकायां मांय हवा री गुणवत्ता मांय सुधार री कोशिशें सारु साढे 13 करोड़ रुपया ई भेज्या। ई दौरान जयपुर कने सांगानेर मांय सामान्य अपशिष्ट उपचार संयंत्र ई

जनता ने सूंपी ज्यो। मुख्यमंत्री इलेक्ट्रॉनिक कचरो भेळो करण रा अभियान री सरुआत कीनी अर ई-वेस्ट ड्राइव गाड़ियां ने हरी झंडी बता र रवाना कीनी। कार्यक्रम मांय राजस्थान प्रदूषण नियंत्रण मंडल री ओर ऊं बणायी ज्या ऑटो रिन्यूवल सिस्टम रो ई उद्घाटन करी ज्यो। ई सागे ई गन्दो पाणी साफ करण रा छह नुवा प्लांट अर 54 नुवी सड़क सफाई मशीनां ई जनता ने सूंपी ज्यो। ई मौके मुख्यमंत्री प्रदेश री जनता ऊं कुदरत अर पाणी ने बचावण सागे ही खाद्य संरक्षण सारू ई आगे आवण री अपील कीनी। वे लोगां ऊं पाणी अर पर्यावरण ने बचावण सारू योगदान ऊं जुड़्या काम करता थकां खुद रा वीडियो सोशल मीडिया माथे पोस्ट करण री अपील कीनी।

000

कार्यक्रम मांय वन अर पर्यावरण मंत्री संजय शर्मा, संसदीय कार्यमंत्री जोगाराम पटेल, सांसद मंजू शर्मा, मुख्य सचिव सुधांशु पंत, वन विभाग रा अहलकार, खुद सेवक समूहां रा नुमाइन्दा अर पर्यावरण रा हलका मांय चोखो काम करण वाळा लोग मौजूद रह्या।

000

गंगा दशमी रे मौके आज प्रदेश मांय **वंदे गंगा जल संरक्षण-जन अभियान** री सरुआत करी ज्यो। इण रे मार्फत राज्य मांय जमी हेटे पाणी रो लेवल बचावण अर पाणी भेळो करण री खास ठौड़ां ने और बेहतर बणावण री मुहिम चलायी जावेला। 20 जून ताई चालण वाळा ई अभियान रा तैत लोगां ने पाणी बचावण अर भेळो करण रो संदेश दियो जावेला। कार्यक्रम री सरुआत जयपुर कने रामगढ बंधा ऊं व्ही, जठे मुख्यमंत्री भजनलाल शर्मा ई मौजूद रह्या। कार्यक्रम रे दौरान स्थानीय विधायक, जनता रा नुमाइन्दा अर आमजन बंधा मांय श्रमदान कीनो। ई पाछे बूंदी जिला रा केशोरायपाटन मांय राख्यी ज्या कार्यक्रम मांय मुख्यमंत्री चंबल नदी रा तट माथे पूजन कर र पाणी बचावण रा कामां रो उद्घाटन कीनो। ई मौके श्री शर्मा लोगां ऊं वाणी बचावण सारू आगे आवण री अरज करता थकां इण ने अभियान रा तौर ऊं चलावण बाबत कह्यो। राज्य रा न्यारा-न्यारा जिलां मांय ई **वंदे गंगा जल संरक्षण-जन अभियान** रा उद्घाटन कार्यक्रम राख्यी ज्या। जिला मुख्यालयां माथे मुख्यमंत्री रा कार्यक्रम रो सीधो प्रसारण करी ज्यो। ब्यावर मांय उपमुख्यमंत्री दिया कुमारी वठे रा विधायक अर जनता रा नुमाइन्दा री मौजूदगी मांय पीपल रो पौधो लगा र कार्यक्रम री सरुआत कीनी। अजमेर रा वरुण सागर माथे केन्द्रीय कृषि राज्यमंत्री भागीरथ चौधरी जनता सागे श्रमदान कीनो। जोधपुर मांय राख्यी ज्या कार्यक्रम मांय राज्यसभा सदस्य राजेन्द्र गहलोत अर प्रभारी मंत्री मदन दिलावर ई सिरकत कीनी। डूंगरपुर मांय प्रभारी मंत्री बाबूलाल खराड़ी मौजूद रह्या जद के सिरोही मांय **सांसद** लुम्बाराम चौधरी अखेलाव तळाव माथे श्रमदान कर र अभियान मांय भागीदारी निभाई। ई मौके श्री चौधरी सिरोही मांय पाणी बचावण रा कामां सारू दो करोड़ रुपया मंजूर करण परां प्रधानमंत्री नरेन्द्र मोदी रो आभार जतायो।

000

राज्यपाल हरिभाऊ बागडे कह्यो है के प्रदूषण रोकण री सगळां री जिम्मेदारी है। वे पर्यावरण बचावण ने सगळां री जिम्मेदारी बताता थकां कह्यो के ई सारू हर लेवल माथे कोशिश करी जावणी चाहिजे। विश्व पर्यावरण दिवस रे मौके जयपुर रा एक गैर-सरकारी शैक्षणिक संस्थान मांय विज्ञान भारती री ओर ऊं राख्यी ज्या कार्यक्रम मांय राज्यपाल जनता ऊं बत्ता ऊं बत्ता पेड़-पौधा रोपण अर वां री सार-संभाल करण री अपील कीनी। ई मौके राज्यपाल पर्यावरण बचावण सारू बेहतरिन काम करण वाळां ने "वृक्ष मित्र" पुरस्कार दे र नवाजा।

000

विश्व पर्यावरण दिवस रे मौके आकाशवाणी रा कार्यक्रम सुणबा वाळा ई वां रा विचार बताया। पद्मश्री मान ऊं नवाजी ज्या श्याम सुंदर पालीवाल प्रधानमंत्री रा एक पेड़ मां के नाम अभियान ने प्रेरणा देवण वाळा बताता थकां वां री सराहवणा कीनी।

000

पाणी बचावण सारु काम करण बाबत् खास ओळखाण राखण वाळा जयपुर रा पर्यावरणविद् पद्मश्री लक्ष्मण सिंह ई वां री भावनावां यों जतायी ।

000

प्रधानमंत्री नरेंद्र मोदी वां री सरकार ने सहानुभूति ऊं भरी अर गरीबां रा कल्याण सारु समर्पित बतायी है । श्री मोदी केन्द्र मांय राष्ट्रीय जनतांत्रिक गठबंधन सरकार रा 11 साल पूरा व्हेवण परां, लोगों ने गरीबी ऊं बाहर लावण सारु केंद्र सरकार कानी ऊं मजबूत बुनियादी ढांचा अर समावेशन री दिशा मांय करी ज्या जतन रो जिक कीनो । श्री मोदी सोशल मीडिया पोस्ट मांय माण्ड्यो के पीएम आवास योजना, पीएम उज्ज्वला योजना, जन-धन योजना अर आयुष्मान भारत सरीखी पहलां लोगों री रहवास, भोजन पकावण रा साफ ईंधन, बैंकिंग अर स्वास्थ्य सेवा तांई पहुंच बधायी है ।

000

वरिष्ठ नागरिक तीर्थ यात्रा योजना रा तहत जयपुर ऊं तमिलनाडू रा रामेश्वरम् सारु काल पहली वातानुकूलित राजस्थान वाहिनी भारत गौरव पर्यटक रेलगाड़ी रवाना व्हेला । ई साल पेश करी ज्या रा बजट मांय आ गाड़ी चलावण रो ऐलाण करी ज्यो हो । मुख्यमंत्री भजनलाल शर्मा रो ई गाड़ी ने देवस्थान मंत्री जोराराम कुमावत री मौजूदगी मांय जयपुर रा दुर्गापुरा रेलवे स्टेशन ऊं हरी झंडी बता र रवाना करण रो कार्यक्रम है । ई खास रेलगाड़ी मांय छह जिलां रा करीब आठ सौ मुसाफिर रामेश्वरम् जावेला ।

000

स्थानीय सामान ने बधावे देवण रा मकसद ऊं आज जयपुर मांय न्यारा-न्यारा संगठनां री ओर ऊं कारोबारी सम्मेलन राख्यी ज्यो । जयपुर व्यापार मंडल अर फोर्टी री ओर ऊं राख्यी ज्या ई सम्मेलन मांय स्थानीय सामान रो उपयोग करण अर बधावो देवण री शपथ लीरीजी । कार्यक्रम मांय राष्ट्रीय व्यापारी कल्याण बोर्ड रा अध्यक्ष सुनील सिंघी कह्यो के स्थानीय उत्पादां ने बधावो देवणो ई राष्ट्रवाद है ।

000

अंतर्राष्ट्रीय योग दिवस रा सिलसिला मांय आकाशवाणी जयपुर रा क्षेत्रीय समाचार एकांश री ओर ऊं संदेश श्रृंखला चलायी जा रही है । आज पेश है जयपुर रा राष्ट्रीय आयुर्वेद संस्थान मांय योग अर स्वास्थ्य वृत्त विभाग रा सह-आचार्य सर्वेश अग्रवाल रो संदेश ।

000